

Tuzla, 5.6.2012. godine

Saopštenje za javnost

Kreiran akcioni plan Multidisciplinarnog tima za prevenciju maloljetničkog prestupništva i promociju alternativnih mjera za maloljetnike Opštine Srebrenik

U Srebreniku je, 23.5.2012. godine, održana radionica kreiranja akcionog plana Multidisciplinarnog tima za prevenciju maloljetničkog prestupništva i promociju alternativnih mjera za maloljetnike Opštine Srebrenik.

Ovo tijelo je osnovano Rješenjem načelnika Opštine u aprilu 2012. godine, a na inicijativu Biroa za ljudska prava Tuzla. Naime, Biro za ljudska prava Tuzla je nevladina organizacija koja se u posljednjih 7 godina intenzivno bavi problematikom maloljetničkog prestupništva i unapređenjem sistema maloljetničkog pravosuđa, kroz rad sa samim maloljetnicima, njihovim roditeljima i nastavnicima u školama, ali istovremeno i intenzivno saradujući sa sudijama, tužiocima, policijom, socijalnim radnicima, obrazovnim i zdravstvenim institucijama i drugim institucijama za tretman maloljetnih počinitelja krivičnih djela, kao i sa donosiocima odluka na svim nivoima organizacije BiH. Na osnovu dosadašnjih iskustava, prepoznali smo potrebu za stvaranje jedinstvenog tijela u koje će biti uključeni svi profesionalci koji se bave ovom problematikom na području lokalne zajednice, te smo s tim ciljem inicijativu za osnivanje ovakvog tijela uputili Opštini Srebrenik.

U tom smislu, Opština Srebrenik je bila vrlo otvorena za ovaj prijedlog, te je Multidisciplinarni tim za prevenciju maloljetničkog prestupništva i promociju alternativnih mjera za maloljetnike Opštine Srebrenik osnovan kao volontersko tijelo profesionalaca koje za cilj ima koordiniranje i zajedničko pokretanje i provođenje aktivnosti prevencije maloljetničkog prestupništva i promocije alternativnih mjera za maloljetnike na nivou opštine Srebrenik. Tijelo čine predstavnici Opštine Srebrenik, Centra za socijalni rad Srebrenik, Policijske stanice Srebrenik, Prve i Druge osnovne škole Srebrenik, Osnovne škole Rapatnica, Mješovite srednje škole Srebrenik, Aktiva direktora osnovnih i srednjih škola sa područja Srebrenika i Crvenog krsta/križa Srebrenik.

Kako bi što prije započeo sa svojim aktivnostima i intenzivirao svoju prisutnost u lokalnoj zajednici, Tim je, u proširenom sastavu održao i radionicu kreiranja akcionog plana za narednih 12 mjeseci. Na radionici su, pored redovnih članova Tima, prisustvovali i predstavnici roditelja učenika osnovnih škola u Srebreniku, Policijske stanice Srebrenik, Centra za mentalno zdravlje Doma zdravlja u Srebreniku, kao i Općinskog suda u Gradačcu, kao nadležnog suda i za područje Opštine Srebrenik.

Tim je kao svoja strateška opredjeljenja za narednih 12 mjeseci definisao slijedeće oblasti:

1. izgradnja kapaciteta i afirmacija Multidisciplinarnog tima u lokalnoj zajednici,
2. unaprjeđenje uslova za primjenu alternativnih modela postupanja prema maloljetnicima u sukobu sa zakonom;

3. razvijanje koordinirane i kontinuirane prevencije maloljetničkog prestupništva u Opštini Srebrenik i
4. obezbjeđivanje prateće infrastrukture za primjenu alternativnih mjera za maloljetnike.

U sklopu ostvarivanja ovih strateških ciljeva, bit će provedene slijedeće ključne aktivnosti:

- organizovanje serije edukativnih seminara u cilju boljeg razumijevanja problema maloljetničkog prestupništva i mogućih oblika preventivnog djelovanja,
- organizovanje medijske kampanje, radio i TV emisija, okruglih stolova, konferencija i kreiranje informativnog materijala o značaju primjene alternativnih mjera za maloljetnike,
- organizovanje posjete institucijama u zajednici u kojima se izriču i primjenjuju alternativne mjere i definisanje načine njihove međusobne saradnje i koordinacije aktivnosti,
- kreiranje Programa vannastavnih aktivnosti u školama prema afinitetima učenika,
- afirmisanje pozitivnih vrijednosti dodjelom nagrada, organizovanjem takmičenja i putovanja, izborom najboljeg sportiste isl.,
- zagovaranje da Opština podrži uvođenje novih i nesmetano korištenje postojećih kulturnih, sportskih i edukativnih sadržaja za djece u njihovo slobodno vrijeme,
- izrada Programa rada sa djecom izvan obrazovnih institucija (u lokalnoj zajednici),
- informisanje roditelja i djece o mogućnostima korištenja sadržaja u lokalnoj zajednici,
- educiranje roditelja i djece o dječijim pravima, metodama nenasilne komunikacije, transformacije konflikta i odgovornom roditeljstvu kroz tematska predavanja i radionice,
- jačanje zaštitnih faktora u školama kroz organizovanje radionica za nastavnike, roditelje i djecu iz oblasti prevencije nasilja u školi i prevencije zloupotrebe psihoaktivnih supstanci,
- zaključivanje Sporazuma o saradnji sa zainteresovanim preduzećima, organizacijama i ustanovama u javnom i društvenom sektoru koje će provoditi odgojnu preporuku - rad u korist humanitarne organizacije ili lokalne zajednice,
- opremanje posebne prostorije u Policijskoj stanici Srebrenik i Centru za socijalni rad Srebrenik za rad sa maloljetnicima, kao i niz drugih aktivnosti.

Za sva dodatna pitanja i informacije možete se obratiti OŠ. "Tinja" (direktor Enis Dedić, predstavnik Aktiva direktora osnovnih i srednjih škola opštine Srebrenik, kontakt telefon 035 651 619) i Birou za ljudska prava Tuzla (projekt koordinator Lejla Mehanović, kontakt telefon 035 360 491).

** Osnivanje i rad Tima provode se u okviru projekta „Restorativna pravda za maloljetnike u BiH – ublažavanje posljedica maloljetničkog kriminaliteta“, koji finansira Evropska unija, a provode Biro za ljudska prava Tuzla i ToPeeR Doboj.*

S poštovanjem,

Multidisciplinarni tim za prevenciju
maloljetničkog prestupništva i promociju
alternativnih mjera za maloljetnike
Opštine Srebrenik